

आकाशवाणी

- सरकारै आप्रेशन सिंदूर दे बाद आहली स्थिति पर चर्चा करने लेई अज्ज सब्भनें दलें दी इक अहम बैठक सद्दी ऐ।
- कई फिल्मी ते खेडु हस्तिएं आप्रेशन सिंदूर दी सराहना करदे होई सरकार ते सेना कन्नै अपनी इकजुटता दस्सी ऐ।
- केंद्री गृह मंत्री अमित शाह होरें पाकिस्तान ते नेपाल बन्नै कन्नै लगदे राज्यें गी सोशल मीडिया पर दुष्प्रचार करने आहले तत्वे पर नेइमी तक्क रक्खने लेई आखेआ ऐ।
- ब्हाई डोआरियां रद्द होने कारण लद्दाख च फसे दे सैलानिएं दे ठैहरने लेई होटलें आहले मुफ्त सेवा दी पेशकश कीती ऐ।
- संस्कृति मंत्रालय नै सोथेबी हांगकांग आसेआ पवित पिप्रहवा बोद्ध अवशेषें दी कल होने आहली निलामी गी अगड़ा पाई देने च कामयाबी हासिल कीती ऐ।
- महिला त्रिकोणीय मुलखें दी इक रोजा अंतरराष्ट्रीय श्रृंखला च भारत दक्खन अफ्रीका गी 23 रन्ज कन्नै हराने दे मगरा श्रीलंका दी टीम कन्नै मुकाबला खेडुने लेई तैयार ऐ।
- मौसम विभाग नै मुलखे दे पूर्वी, पच्छमी, मध्य ते पूर्वोत्तर इलाकें च अगले 4-5 दिनें दौरान हल्की बरखा करने दे असार दस्से न।

<><><><><><>

All Party Meet

आप्रेशन सिंदूर दे मद्देनजर सरकार नै अज्ज नमी दिल्ली च सर्वदलीय बैठक सद्दी ऐ। इसदे च सारे राजनैतिक दलें दे नेताएं गी आप्रेशन सिंदूर दे बारै च जानकारी दिती जाग। पार्टी लाइन सोयां हटिए नेताएं आप्रेशन सिंदूर दी सराहना कीती ऐ ते आतंकवादियें खिलाफ सशस्त्र बलें दी कार्रवाई पर मान

जाहिर कीता। इसदे थ्वा पैहले, पहलगाम आतंकी हमले मगरा सारे दलें सरकार दी हर संभाव कारवाई दा समर्थन कीता हा।

<><><><><><>

Film Reaction

फिल्में ते खेड्डें कन्नै जुड़ी दिएं केइएं हस्तिएं पाकिस्तान खलाफ आप्रेशन सिंदूर दी कामयाबी पर भारतीय थेआरबंद बलें दी सराहना कीती ऐ। अभिनेता अक्षय कुमार, कंगना रनौत, अल्लू अर्जुन ते सुनील शेटी नै पहलगाम च होए दे आतंकी हमले दे परते च पाकिस्तान ते पाकिस्तान दे नजैज कब्जे आहले जम्मू-कश्मीर च आतंकी ठकानें पर हमले करने दी भारतीय सेना दी कार्रवाई दी सरहना कीती ऐ। इक सोशल मीडिया पोस्ट च अक्षय कुमार होरें कैप्शन दित्ता ऐ “जय हिंद-जय महाकाल”। कंगना रनौत होरें इस मौके आतंकवाद गी दना बर्दाश्त नेई करने दे सरकार दे धेइयै गी दोहरांदे होई आखेआ जे भगवान उंदी रक्षा करदे न। तोआई अल्लू अर्जुन नै एहदे पर अपने सोशल मीडिया पर लिखेआ “न्याय थोए जय हिंद”। फिल्म निर्माता शेखर कपूर होरें आखेआ जे पहलगाम च होए दे आतंकी हमले पर भारत दी प्रतिक्रिया दुनिया गी दस्सदी ऐ जे भारत किन्ना जिम्मेदार ऐ। मशहूर क्रिकेटर सचिन तेंदुलकर, गौतम गंभीर, हरभजन सिंह, सुरेश रैणा, बजरंग पुनिया, साक्षी मलिक ते देवेंद्र झाझरिया होरें बी भारतीय फौज दी कार्रवाई दी सराहना कीती। सचिन तेंदुलकर होरें आखेआ जे दुनिया च आतंकवाद लेई कोई थाहर नेई ऐ।

<><><><><><>

Amit Shah

केंद्री गृह मंत्री अमित शाह होरें पाकिस्तान ते नेपाल दे बन्ने कन्नै लगदे राज्यें गी सोशल मीडिया ते होरें मीडिया मंचें पर असमाजी तत्वे आसेआ कीते जा रदे राष्ट्र विरोधी प्रचार पर नेइमी तक्क रखने दा निर्देश दित्ता ऐ। नेह राज्यें दे मुख्ब मंत्रिएं, पुलस महानिदेशकें ते मुख्ब सचिवें कन्नै लग्गी दी इक महत्वपूर्ण बैठका च शाह होरें आखेआ जे इस चाल्ली दी हरकत करने आलें खलाफ तुरत ते सख्त कार्रवाई कीती जा। अमित शाह होरें आखेआ जे अपात स्थिति च कार्रवाई करने लेई अगग स्हालने आहले मैहकमे गी तैयार रक्खेआ जा ते एहदे अलावा आम जनता लेई जरूरी सेवा सुविधा बी पूरी चाल्ली तैयार ते उपलब्ध रखना यकीनी बनाया जा।

<><><><><><>

US Law Make

भारती मूल दे अमरीकी सांसद राजा कृष्णमूर्ति होरें पाकिस्तान दा आहवान करदे होई आखेआ ऐ जे ओहू भारत कन्नै मजूदा तनोतनी दा इस्तेमाल लोकतंत्र गी होर कमजोर करने दे ब्हाने दे रूपै च नेई करै। जिसलै जे अमरीका दे इक होर सांसद नै भारत दी जवाबी कार्रवाई दा पूरा समर्थन कीता ऐ भारतीय मूल दे गै इक दुए सांसद श्री थानेदार होरें आखेआ जे आतंकवाद गी कदें बर्दाश्त नेई कीता जाई सकदा ते एहदा परता दित्ते बगैर कसूरवारें गी छोड़ी देना बी गलत गल्ल ऐ।

<><><><><><>

Ladakh-Tourists

आप्रेशन सिंदूर दे बाद लद्दाख च लेह ब्हाई अड्डा बंद होने कारण उत्थे डकोए दे सैलानिएं दे ठैहरने लेई मुफ्त सेवा दी पेशकश कीती जा'रदी ऐ।

ऑल लद्दाख होटल एंड गेस्ट हाउस एसोसिएशन दे सभ्भनैं हितधारकें नेह हालात च सैलानिएं दी दिक्खभाल दी जिम्मेदारी लैने ते उंदे प्रति अपनी हमदर्दी ते समर्थन प्रगट करदे होई अपने इस फैसले दी जानकारी सांझी कीती। एल्लै लद्दाख च ज्हारें दी गिनतरी च सैलानी, ब्हाई डोआरियां रद्द होने कारण उत्थे फैसे देन। कोई बी सैलानी जेडे उत्थे होटलें च रवा करदे न ओहू एसोसिएशन आसेआ कीती गेदी इस पेशकश दा फैयदा लेई सकदे न।

<><><><><><>

LoC-Firing

भारतीय सेना नै जंदी रातीं जम्मू-कश्मीर दे नियंत्रण रेखा कन्नै लगदे इलाकें च पाकिस्तानी फौज दी गोलीबारी दा पूरी तगडेयाई कन्नै बनकदा परता दित्ता ऐ। रक्षा सूत्रें जानकारी दित्ती ऐ जे पाकिस्तानी फौज नै जम्मू-कश्मीर दे कुपवाड़ा, बारामूला, उड़ी ते अखनूर इलाकें दे पार नियंत्रण रेखा पर बिजन उक्सावे दे लौहके थेआरें कन्नै गोलीबारी कीती ही जेदे पर साहडे बलें तगड़ा बनकाइयै परता दित्ता ऐ।

<><><><><><>

Culture-Deptt.

संस्कृति मंत्रालय नै सोथेबी हांगकांग आसेआ पवित्र पिप्रहवा बौद्ध अवशेषों दी निलामी गी टालने च कामयाबी हासल करी लैती ऐ जेड़ी कल होने आहली ही। पिप्रहवा अवशेषों दी खुदाई 1898 च विलियम कलैक्सटन पेप्पे नै कीती ही। एहदे च ऐतिहासिक बु; दिएं अस्तिएं दे कन्नै-कन्नै सुन्ने दे गहनें ते रत्न जनेही चीजां ते किश होर समेयान बी शामिल ऐ। इक कास्केट उप्पर ब्राह्मी लिपि च लिखे दा इक शिलालेख इनेंगी बुद्ध दे अवशेषों दे रूप च पुष्टि करदा ऐ जेड़े सक्य कुल आसेआ जमा कीते गेदे हे। इनें पवित्र अवशेषों दा मता हिस्सा 1899 च भारतीय संग्रहालय कोलकाता च मुंतकिल कीता गेआ हा।

<><><><><><>

ODI-Tri Series

भारत, दक्खन अफ्रीका गी 23 रन्ज कन्नै जंदी रातीं कोलम्बो च महिलाएं दी 3 मुल्लें दी इक रोजा अंतरराष्ट्रीय मैच दी क्रिकेट श्रृंखला च हून श्रीलंका कन्नै खिताबी मुकाबला खेडूने लेई तैयार ऐ। Jemimah Rodrigues नै अपने करियर दा बेहतर प्रदर्शन करदे होई सैकड़ा जड़ेआ ते सलामी बल्लेबाज समृति मनदाता ते दीप्ति शर्मा नै हाल्फ सेंचुरी बनाई। इस चाल्ली दी शानदार बल्लेबाजी दी बदौलत भारत नै 9 विकेटें दे नुकसान पर 337 रन बनाए ते मगरा तेज गेंदबाज सीमर अमनजोत कौर ते ऑफ स्पिन्नर दीप्ति शर्मा दी अगुवाई च भारत नै विपक्षी टीम गी 7 विकेटें दे नुकसान पर 314 रन्ज पर गै समेटी दित्ता। भारत दे 4 मैचें च 6 अंक न। दुई बक्खी श्रीलंका दे 3 मैचें च 4 अंक न ते ओह 2 होर अंक हासल करी सकदी ऐ।

<><><><><><>

Weather

मौसम विभाग नै अगले 4-5 दिनें दौरान देसै दे पूर्वी, पच्छमी, मध्य ते पूर्वोत्तर क्षेत्रें च हल्की कोला दरम्याने दर्जे दी बरखा बरने दे असार दस्से न। मैहकमे दा आखना ऐ जे 11 मई तगर महाराष्ट्र, गुजरात, मध्य प्रदेश, विदर्भ ते छत्तीसगढ़ च हल्के दर्जे दी बरखा दे इमकान न जिसले जे उत्तराखंड च ऐन गड़ा पौने

ते गुजरात च मूलाधार बरखा पौने दे असार ना। तोआई पच्छम बंगाल दे तराई आहले इलाकें दे किश हिस्सें सिक्किम, पच्छम बंगाल ते गंगा कन्नै लगदे इलाके ओडिशा, बिहार ते झारखंड च अगले 5एं दिनें दौरान लू चलने दी पेशगोई कीती गेदी ऐ।

<><><><><><>

IPL

आई.पी.एल टी-20 क्रिकेट च चेन्नई सुपर किंग्स नै जंदी रातीं कोलकाता दे इडन गार्डन च कोलकाता नाईट राइडर्स दी टीम गी 2 विकेटें कन्नै हराई दित्ता।

<><><><><><>